

S'omine

Salvatorangelo Manca

Tancas serradas a muru fattas as'afferraafferra si su chelu fidi in terra si l'aiana serradu puru

C'ia coiau dae pagu chent'annos, dae cando Vittorio Emanuele I aia postu sa frima in "l'editto delle chiudende" (1820), chi custa quartina nos amentada, cando fu'comintzada sa "carriera" de tziu Tittinu Pes "Leredda"⁽¹⁾

Su mestieri fu' cussu de perittu, a narrere, funi cussos chi tando si nariana sos "Omines" chenza azungher atteru. Omines chi 'eniana cricaos dae sa zente pojare valore a cosas o animales chi enian postas in divisione o chi cherian postas in su "sotziu"⁽²⁾ e pò cussu deviana essere notas pò pessones balentes e zustas.

Si como abbadiamos sos sartos sedilesos, bidimos chi suni dividios in paritzas miza de cantos; tzertu una bona parte de curpa, si curpa si pode narrere, ziu Tittinu dda tenede «Non podiamos faghene in attera manera» nos narada «Sas propiedades, a cando appo comintzau custu traballu, funi jai meda dividias e isparzinadas unu cantu in donnia parte de su sartu sedilesu. Si a cussu si azzunghede chi sa calidade de su terrinu mudiada, non solu dae zona a zona ma trettu pò trettu, si podede cumpredede cantu fu diffitzile a faede, pò

narrere, varias partes de su matessi valore. Po cussu su pru de sas bortas, pò accuntentare tottas sas partes, capitada de dividire unu picculeddu de terra in cantos funi sos eredes».

Ma cernente fu cornintzada sa "camera" de ziu Tittinu? Sighidi a contare «A vintiduos annos fui jai piritu de su sotziu e a pustis de pagu tempus mi aiana comintzau a cricare pò chistiones de terrinos puru, sempe paris cun calecunu de sos antzianos chi, cussu traballu, ddu funi fainde dae tempus. Fintzas a tando pò medire si pigaiana in fatu una fune jai media, a pustis amos sempre mediu a passos. A bortas si fu pagu trettu bastaiada unu corpu de ogu. Custu si podiada faede ca innanti sa misura de su terrinu fudi su semene chi bi cheriada pò ddu prenede, pò cussu si nariada chi unu terrinu "leaiada" tantu; e nos isballiamos de pagu, ca fumis prima e tottu massajos.»

Custos omines funi tentos in cussideru mannu, si eniana muttios a narrere su parrer' issoro fintzas dae su zuighe cuntziliadore e dae su prettore, cando bi aiada cachi erentzia chi non si poniada de accordu in sa divisione. Narada tziu Titinu «aiamos mediu cun Sarbadoranzelu Leori, sa 'e sos Nieddos in Campu 'e Corte⁽³⁾ e cando sas cosas suni andadas in leze, sos inzenieris postos dae su tribunale, medinde, torraiana a sos puntos chi aiamos postu nois, zustos zustos.» Tziu Titinu teniada in domo sua bell'e tottus sas peritzias fattas in prus de sessant'annos de passos peri sos sartos de Sedilo, ca est'istau su primu de sos peritos



Fasi della trebbiatura (foto dell'archivio Pro Loco Sedilo).

chi ischiada iscriede, ma pagos annos faghede c'ada brusiau tottu pentzande chi cussos paperis no interessaiana a nemos. Custu nos deppede faghede movede a sarbare, fintzas chi semus a tempus su chi est regortu in sa memoria de sos mannos nostros.

Dimandamos a tziu Titinu comente si faghiada a medire unu terrinu; nos narada «sa prima cosa de narrede est chi s'impreiana sas mesuras sardas, chi pò cantu nd'isco funi uguales in tottu sa Sardigna⁽⁴⁾. Si abbadaiaada ite forma jughiaada su terrinu e si fudi meda a biscorriu⁽⁵⁾ beniada segau in varios cantos chi a pustis mediamos a unu a unu. Tzertu cando si faeddaiaada de semeneri cachi piticca differentzia bi podiada essere puru, ca sa cantidade de su semene dipendiada sia dae su passu chi dae sa manu de su massaiu che de sa tempera de sa terra. Po narrede, si fudi a terra lebia (assutta) bi cheriada prus pagu semene chi no si fudi a terra carrigada (iffusta). In Sorradile semenaiana prus a lascu de nois ca ddu faghiana a mola cotta (in terra brusiaada)».

Dae meda tempus s'impreana, pò medire in su sartu, sas mesuras chi suni uguales in beli'e tottu su mundu, ma inoghe cando si chistionada de terras es fatzile intendede ancora faeddos comente mesuras, moios e carras⁽⁶⁾ o nande «cussa terra este una carra de aria, ma de semeneri non bi este» cussu pò narrede chi in cussa terra bi ada trettos chi non si podene seminare. Bisonzada de narrede puru chi a su valore de su terrinu si azunngghiana, si bi 'nd'aiada, s'aba, poi, 'arzile o menzus ancora puntana e su mattedu, creccos e suerzos, ca a parte sa linna produiana su lande e olias, pò s'ozu e pò mesa. Ma fintzas sa chessa teniada su valore su, ca tando su fogu deviada arreare atzesu tottu s'annu e onnia tantas dies si faghiada sa cotta⁽⁷⁾ e pò su furru fudi sa linna prusu addata.

Cheriamos finire custa chistionada cun tziu Titinu augurandeddi de sighire a ponnede passos meda a su piaghene su, ma este issu matessi chi dda serrada cun d'una pregadoria fatta prima 'e tottu a sos zovanos

«Sos pitzinnos no ana connottu ite cheriada narrede a traballare sa terra cun sas manos e cun s'azudu de sos animales pò podede ottenere sos fruttos pò campare e pesare sa famiglia. Oe sa terra si traballada in modu differente e fortzis non si rispettada. Toccada de si rendere contu chi fintzas oe s'ornine si nutridi de su chi sa terra bi jada e pò cussu dda depimos rispettare jandeddi su zustu valore».

NOTE

- (1) Zuanni Costantinu Pes classe 1906, "Leredda" de pefatziu, chi b' est arreau de parte de sa mamma
- (2) Su Sotziu : "Mutua assicurazione bestiame", naschia in su 1902, fortzis unica in Sardinna.
- (3) Campu de Corte: sartu de Sedilo a lacana cun Ortzai.
- (4) Po cantu nd'ischimos, a bortas, mudan sos numenes de sas mesuras ma arreana paris sos valores. Po narrere, in su Marghine, a sa carreta bi naran'cartu forzis ca este unu quartu de sa carra; in atteros logos sa mesura si narada miaza, meaggia etc etc. Poded'essere chi sun'arreaso sos modos de narrere a segundu de comente sas biddas funi accorpadas in su tempus de sos feudos.
- (5) Biscorriu: chi non zughede una forma quadrada zusta ma prus angulos (corros).
- (6) S'iscala de sas mesuras sedilesas es custa: litru, mesura (chimbe litros), carreta (chimbe mesuras), moju (deghe misuras), carra (vinti mesuras), somma (trinta mesuras). S'ettaru beni'contau pò vintiduas mesuras e custu chere'narrere chi una mesura este 459 mq. Unu moju tiad'essere 4590 mq e non torrada cun su chi narada don Giovanni Mameli, in sa traduzzione de sa Carta de Logu, chi su moju fudi s'istarello kalianu e fudi su tretu de 3525 passos quadraos, fattos de 125 passos pò 25. Segundu custu autore, moju beniada dae su latinu "modius", e sa metade de s'istarello si nariada "quarra" dae inue pode' bennere "carra" chi però no este sa metade de su moju ma su doppiu.
- (7) Cotta: gasi si naraiaada sa provvista de su pane chi 'eniada fatta in sas domos sedilesas, nessi finzas a sos annos sessanta, onnia tantas dies a segunda de su bisonzu.



S'arzola (foto dell'archivio Pro Loco Sedilo).